

Usaglašavanje i zamjena novih entitetskih zakona u Brčko Distriktu

Supervizor za Brčko, Henry Clarke danas je izdao novi nalog supervizora kojim se unapređuje proces usklađivanja i zamjene entitetskih zakona u Brčko Distriktu. Novi entitetski zakoni i nove izmjene postojećih entitetskih zakona se više neće primjenjivati u Brčko Distriktu ukoliko ih Skupština Distrikta ne usvoji kao zakon Brčko Distrikta. Ukoliko to ocijeni potrebnim, Vlada Brčko Distrikta može zamijeniti entitetske propise svojim vlastitim. Na kraju, Vlada Distrikta će pripremiti spisak svih entitetskih zakona koji se još uvijek primjenjuju u Distriktu, kako bi se mogao pripremiti plan za njihovu zamjenu.

Konačnom odlukom Tribunala za Brčko osnovan je Brčko Distrikt kao teritorij sa samostalnom upravom u Bosni i Hercegovini, sa upravnim, zakonodavnim i pravosudnim ovlaštenjima. Konačnom odlukom se od Supervizora za Brčko traži da ustanovi skup zakona koji će se primjenjivati na cijelom teritoriju Distrikta, a koji bi zamijenili postojeće entitetske zakone koji se primjenjuju na jednoj ili drugoj strani bivše među-entitetske linije razdvajanja. U Brčko Distriktu je usvojen značajan broj zakona, ali je taj broj nedovoljan da se zamijene svi entitetski zakoni koji se primjenjuju u Distriktu.

Očekuje se da će mnogi postojeći zakoni sa malim ili nikakvim izmjenama postati zakoni Brčkog, ali ovo se ne može znati pouzdano sve dok se ne pripremi konačan spisak. Ovaj proces zamjene velikog broja zakona Brčko Distrikta će zahtijevati mnogo rada od strane Vlade Distrikta, Skupštine i OHR-a Brčko. To neće odmah utjecati na građane, bilo u Distriktu ili u entitetima.